

Reglur fyrir leikskólanna á Hornafirði

Leikskólar Sveitarfélagsins Hornafjarðar starfa samkvæmt lögum um leikskóla nr. 90/2008, reglugerð um starfsumhverfi leikskóla nr. 655/2009 og Aðalnámskrá leikskóla frá árinu 2011 en námskránni er ætlað að vísa ólíkum hagsmunaaðilum í skólasamfélaginu veginn hvað varðar stefnu og hugmyndafræði leikskólastarfs.

Í sveitarfélaginu eru tveir leikskólar, Krakkakot og Lönguhólar og gilda eftirfarandi reglur fyrir báða skólana.

Fyrsta skólastigið

Leikskólinn er fyrsta skólastig barnsins. Að vera í leikskóla er ákveðinn áfangi á menntabrautinni. Leikskólastarfið miðast við samfellda viðveru barns í leikskóla alla virka daga vikunnar. Því er mikilvægt að barn mæti vel og tímanlega og geti tekið þátt í þeirri þróun sem á sér stað í leik og starfi.

Inntökureglur

A - Skilyrði fyrir leikskóladvöl - Aldursmörk og umsóknir

- Skilyrði fyrir leikskóladvöl barns er að það eigi lögheimili í sveitarfélaginu. Foreldrar sem hyggjast flytja í sveitarfélagið geta sótt um leikskóladvöl en barn fær ekki úthlutað plássi fyrr en lögheimili hefur verið flutt og skulu foreldrar tilkynna skólaskrifstofu sérstaklega um lögheimilisflutninginn.
- Öll börn eins árs og eldri eiga kost á leikskóladvöl þegar leikskólaláss eru laus. Foreldrar geta valið leikskóla fyrir barn sitt að því gefnu að laust pláss sé á viðkomandi skóla. Hægt er að sækja um leikskóladvöl þegar börn hafa náð 9 mánaða aldri.
- Sækja má um leikskóladvöl allt árið en miðað er við að umsóknir að hausti berist fyrir 15. apríl ár hvert.
- Börn með sérþarfir eða börn sem búa við erfiðar félagslegar aðstæður geta fengið forgang. Beiðni um forgang skal berast fræðslustjóra og henni þarf að fylgja umsögn frá félagsmálastjóra.
- Umsóknum um leikskóladvöl skal skilað á bæjarskrifstofu eða skólaskrifstofu sveitarfélagsins. Umsækjandi fær staðfestingu í tölvupósti um að umsókn hafi verið móttækin.

B - Úthlutun og uppsögn leikskólaplássa - upplýsingagiöf

- Aðalinnritun barna fer fram í apríl/maí og þá er úthlutað leikskólarýmum þeirra barna sem útskrifast. Leikskóladvöl barna hefst að jafnaði á tímabilinu júní til september með fyrirvara um laus pláss.
- Leikskólaplássi er úthlutað eftir dagsetningu umsóknar. Börn sem náð hafa þriggja ára aldri hafa þó forgang fram yfir þau sem yngri eru og færast fram fyrir þau á biðlista sé hann fyrir hendi.
- Sé ekki laust pláss á leikskóla sem sótt er um sem 1. val býðst umsækjanda pláss á hinum skólanum sé laust þar. Þiggi hann það en óski jafnframt eftir flutningi þegar laust verður á leikskóla í 1. vali, heldur hann sæti sínu á þeim biðlista.
- Barn skal hefja leikskólagöngu eigi síðar en tveimur mánuðum eftir að leikskólaplássi hefur verið úthlutað. Hefji barnið ekki leikskólagöngu innan þess tíma er plássinu úthlutað til þess barns sem næst er á biðlista. Sé pláss afþakkað þarf viðkomandi í öllum tilvikum að senda inn nýja umsókn.
- Þegar barni hefur verið úthlutað leikskólaplássi skal umsækjanda send tilkynning þar um. Foreldrar svara skriflega hvort þeir þiggi plássið. Í kjölfarið er barn boðað í aðlögun í viðkomandi leikskóla.
- Í viðtali við upphaf leikskóladvalar barns er farið yfir reglur um leikskóla og foreldrahandbók. Foreldrar staðfesta með undirritun sinni á þar til gert viðtalsblað að þeir hafi kynnt sér gjaldskrá og reglur leikskólanna á Hornafirði og skuldbinda sig til að hlíta þeim eins og þær eru á hverjum tíma.
- Uppsögn eða ósk um breytingar á dvalartíma skal miða við 20. hvers mánaðar. Uppsagnar- eða breytingafrestur miðast við tvær vikur. Uppsögn skal vera skrifleg og skilast til leikskólastjóra. Hið sama gildir um breytingar á dvalartíma.

Opnunartími – skipulagsdagar og sumarleyfi leikskóla

Árlegur starfstími leikskólanna er ellefu mánuðir. Á tímabilinu júlí – ágúst eru skólarnir lokaðir samfellt í 21 virkan dag.

Leikskólarnir starfa 5 virka daga í viku frá klukkan 7:45 – 16:15. Hægt er að velja upphaf skóladags kl. 08 eða kl. 09 og börn geta dvalið þar í 4 – 8 ½ klukkustund. Leikskólar eru lokaðir fimm daga á ári vegna skipulags- og námskeiðsdaga. Þessir dagar eru skipulagðir í samvinnu við grunnskólann. Leikskólar eru lokaðir 24. og 31. desember. Leikskólagjöld lækka ekki vegna þessa.

Leikskólagjöld og afsláttur

- Foreldrar greiða leikskólagjöld í hlutfalli við þann tíma sem börn þeirra dvelja í leikskólanum. Á innheimtuseðli kemur fram kostnaður vegna skólatíma annars vegar og fæðis hins vegar sem og hlutfall kostnaðarþátttöku foreldra og sveitarfélagsins. Greiðsla fyrir skólatíma og fæði fara saman. Því skal greiða fyrir allt fæði, það er morgunverð/morgunhressingu, hádegisverð og síðdegisverð, sem fram er borið á skólatíma hvers barns.
- Fyrsti innheimtuseðill miðast við þann dag sem barn hefur verið boðað í aðlögun.
- Veittur er systkinaafsláttur með eftirfarandi hætti: 50 % af grunngjaldi með öðru barni og 100 % af grunngjaldi með þriðja barni.
- Einstæðir foreldrar fá 30 % afslátt af leikskólagjaldi en greiða hins vegar fullt fyrir fæði barna sinna.
- Óski foreldrar eftir því að taka barn sitt úr leikskóla um skeið verður að greiða öll skólagjöld til að tryggt sé að barnið haldi plássinu. Mögulegt er að sækja um undanþágu frá greiðslu fæðis ef barn er utan leikskóla í tvær vikur eða lengur.
- Komi upp alvarleg veikindi hjá börnum um lengri tíma er hægt að sækja um niðurfellingu leikskólagjalda til skólaskrifstofu.

Innheimta leikskólagjalda

- Leikskólagjöld eru innheimt mánaðarlega fyrirfram. Eindagi er 15. hvers mánaðar. Leikskólagjöld eru ekki innheimt þann tíma sem leikskólarnir eru lokaðir vegna sumarleyfa.
- Séu leikskólagjöld ógreidd á eindaga fær greiðandi sent ítrekunarbréf. Hafi krafa ekki verið greidd innan 10 daga frá ítrekunarbréfi, fær greiðandi aðvörun frá sveitarfélaginu.
- Fari skuld á leikskólagjöldum fram yfir 3 mánuði frá gjalddaga er foreldrum sent uppsagnarbréf þar sem plássi barnsins er sagt upp frá og með 1. degi næsta mánaðar. Gefinn verður 10 daga frestur til að ganga frá skuldinni ella verður barnið að hætta í lok mánaðar og skuldin fer í innheimtu.

Veikindi og smithætta

- Óheimilt er að hafa veikt barn í leikskóla. Börn skulu vera minnst 1 - 2 daga heima hitalaus. Við ákvörðun um inniveru eftir veikindi skal farið eftir reglum viðkomandi leikskóla.
- Fáir barn smitandi sjúkdóm, s.s. hlaupabólu, fimmtu veikina eða annað sem smitast á milli manna s.s. njálg, lús, kossageit, augnvírus, verður það að dvelja heima þar til

smithætta er liðin hjá. Lúsasmit ber að tilkynna til leikskóla og heilsugæslu og njálg til leikskóla.

- Greinist barn með óþol, ofnæmi, astma eða annað sem krefst sérstakrar meðhöndlunar í leikskóla skal skila læknisvottorði því til staðfestingar.
- Foreldrar/forráðamenn eiga að láta starfsfólk vita ef barn kemur ekki í leikskólann vegna veikinda eða einhvers annars.

Samþykkt á fundi bæjarráðs 25. janúar 2016.

Samþykkt á fundi í fræðslu- og tómstundanefnd 20. janúar 2016.